

Boy Ecury - Pa alumnonan di St. Jozef Mavo - Willemstad  
25 di aprel 1995.  
Bon dia tur hende i danki pa boso presensia.

Ta pa mi un privilegio di por dirigí palabra na boso tur awe  
i konta boso algu di mi ruman Boy.

Nos tabata 13 ruman, yunan di un tata rubiano i un mama  
kurasoleño. E ruman mayó a nase na año 1911 i esun di mas  
chikitu na año 1933.

Boy tabata e di shete yu i el a nase dia 23 di aprel di año  
1922. Ke men, si e tabata na bida, antayera lo el a hasi  
73 año. En realidat, e no tabatin sino 22 año dia nan a  
fusil'é. Dia 23 di aprel ta dia di San Jorge, i pesei  
Boy su di dos nòmber ta Jorge. Su nòmber kompleto ta:  
Segundo Jorge Adelberto.

Dia e yu a nase, e dòkter merikano ku tabatin na Aruba  
e tempu ei, esta Dr. Hopkins, a sali for di kamber  
bisa mi tata: "It's a boy!" Asina e yu a haña su nòmber di  
kariño.

Mi a bisa awor ei: "dia nan a fusil'é" pasobra aunke djis aki  
mi tin di papia di alemannan komo enemigu durante e di dos  
guera mundial, mi no ta konsiderá kua aleman ku mi topa  
awendia komo mi enemigu. I-maske mi bisawela tabata katibu,  
mi no ta konsiderá kua makamba ku mi topa komo enemigu  
tampoko.

Mi no kier biba ku rabia den mi kurason, pasobra e ora ei  
no ta sobra lugá pa pas reina den mi bida.

Loke sí nos tin di hasi ta di sigui rekordá sakrifisio di  
esnan ku a lucha pa hustisia i libertat.

Podisé hopi hóben djawe no sa, pero Antia Hulandes mester a  
hasi hopi sakrifisio durante e di dos Guera Mundial, tantu  
ta sakrifisio ekonómiko komo sakrifisio pa loke ta bida  
humano.

Defensa di nos islanan tabata na enkargo di Hulanda, pero  
unabes alemannan a okupá Hulanda, ta Antia mes mester a  
finansiá su defensa.

Ademas Antia a kontribuí 7 mion florin pa yuda Aliadonan  
den guera kontra Alemania.

Pa esnan ku a pèrdè nan bida, tin un estatua "Vrijheidsbeeld"  
na nan memoria na Waaigat. Ei año dia 4 di mei tin un  
seremonia kòrtiku. Segun añanan ta bai pasando, e grupo di  
famianan presente ta bira mas i mas chikitu. Pesei, mi ta  
kontentu ku e año akí, alumnonan di St. Jozef Mavo lo  
presensia e akto. Mi ta spera ku den futuro mas skol lo sigui  
e bunita ehèmpel.

Durante guera, tantu ta Aruba komo Kòrsou tabata mashá  
importante, komo nos refinerianan tabata suministrá un parti  
konsiderabel di zeta. Mi no sa di Shell, pero di Lago na  
Aruba mi sa ku di kada 17 bari di zeta ku Aliadonan a uza,  
un bari tabata di Aruba.

Tin 4 víktima di guera ku ta kai bou di e denominashon "Soldaat van Oranje", komo ku nan a bringa na i pa Madre Patria Hulanda. Tres di e personanan akí ta di Kòrsou i un di Aruba, esta mi ruman, Boy. Na Kòrsou tin kaya ku nomber di tur e kuater personanan akí.

E tres personanan di Kòrsou ta:

| Charles Marius Debrot, kende a nase na Kòrsou, dia 17 di mart di 1920. El a fayesé luchando pa defendé un aeropuerto banda di Den Haag.

| Jan Frederik Haayen, nasé na Kòrsou dia 3 di aprel 1919. Komo luitenant den Marina Hulandes, el a fayesé den bataya riba Java zee na febrüari di 1942.

George John Lionel Maduro a nase na Kòrsou dia 16 di yüli di año 1916. El a studia lei na Universidat di Leiden. Komo ofisir di reserva, el a lucha ku balentia pa derotá alemanan ku tabata baha na Rijswijk ku parachüt.

Despues ku ehérsito hulandes a kapitulá, el a bira miembro di Resistensia.

Huyendo pa yega Spaña na 1943 pa djòin ehérsito hulandes na Inglatera, nan a traishon'é i aleman a kohe prezu, mand'é kampo di konsentrashon na Dachau. E kurasoleño balente akí a muri di tifoidea durante su internashon, dia 9 di febrüari 1945. Ironia grandi ta ku djis un luna despues guera a terminá.

Boy, mi ruman, a bai studia na Hulanda na año 1937, pasobra e tempu ei na Ruba ta te 8e klas ULO por a bai. Ta te na año 1941 nos a haña MULO na Aruba.

Boy a bai un internat di frater na Oudenbosch, pa studia Komersio.

Na año 1942, despues ku el a haña su diploma di Praktijk Boekhouden, Boy a disidí di bai Tilburg, na provinsia di Noord Brabant, pa sigui studia.

Pero barbaridatnan ku alemanan tabata kometé, a pone ku e no por a sigui biba sin bai kontra tantu krueldat, e no por a keda sin kontribuí su tempu i su forsa pa bringa esei.

El a bira miembro di Resistensia.

Na tur manera e hendenan den Resistensia tabata kontrariá alemanan. Hendenan den peliger, nan tabata yuda haña lugá pa nan skonde, riba sòldu, den kashi tras di muraya i asta bou di flur di kas.

Nan tabata pasa informashon di moveshon di ehérsito aleman pa Inglatera, miéntas ku si nan hañabo ku un radio so, ya tabata basta pa nan tirabo mata manera kualke kachó.

Kua chéns ku nan haña, nan tabata pone trein aleman sali for di riel i nan tabata pega trùk di alemanan na kandela.

Tambe nan tabata yuda pilotonan di avionnan ingles i merikano ku a kai pa nan hui òf pa nan haña kaminda di skonde.

Nan tabata organisá atake riba mangasinanan di alemanan pa haña paña, kuminda i plaka pa e miles di personanan ku tabata biba skondí. Tin biaha nan tabata haña komando pa mata alemanan i traidornan hulandes.

Pa via di su koló, nan tabata rekonosé Boy fásilmente entre tur e hende blankunan. Hopi bes e mester a hui i e tambe mester a biba skondí kada bes ku nan tabata spiert'é pa hasi esei.

Na fin di sèptèmber 1944, Boy mester a bai Rotterdam. Su grupo di Resistensia mester a stroba alemannan di destruí instalashonnan den haf di Rotterdam.

Promé ku el a bai Rotterdam, Boy a bai serka nos ruman Mimi na Voorburg. El a bisa: "Mi tin un mishon mashá peligroso di kumpli kuné. Si algu faya, mi no ta skapa."

Boy a laga un karta di despedida pa nos mayornan, pa si e muri Mimi entregá e karta p'e.

El a pidi dera su restunan mortal na Aruba i el a pidi pordon pa e doló ku su morto lo kousa su mayornan.

Dia 5 di novèmber 1944, ora Boy tabata sali for di un misa na Rotterdam, traidornan a rekonos'é i nan a pasa e informashon pa alemannan. Alemannan a aresta Boy huntu ku tres amigu mas, miembronan tambe di Resistensia.

Nan a interogá nan i posiblemente nan a torturá nan tambe. Alemannan a proponé Boy pa traishoná su amigunan pa e salba su bida. Sabiendo ku e tabata di Antia, nan a asta ofresé salvokondukta te na kas di su tata. Boy su kontesta tabata:

Den kas di mi tata no tin lugá pa traidor.

Di e kuater arestadonan, Boy i dos otro a haña pena di morto. Esun di kuater, Tonny Brantenaar, a biba pa konta kiko a pasa.

Dia 6 di novèmber 1944 Boy i su dos amigunan a entregá nan alma na Señor.

Despues di guera, a haña restunan mortal di Boy, identifiká pa su amigunan.

Dia 15 di aprel di 1947, Boy a haña un entierro ofisial na Aruba, den presensia di tur su famianan, segun su último deseo.

Mi no por lubidá palabranan di mi tata e dia ei. Tabata di tres bes den mi bida ku mi a mir'é yora. Dia su mama a muri na aña 1941, dia ku a yega notisia di Boy su morto i dia ku a dera Boy. Mi tata di: "No tin sufrimentu mas grandi ku ora un mama òf un tata mester dera nan yu."

Siudadanonan di Aruba a forma un komité i a pèrkurá pa bini un monumento na Boy su memoria, na Oranjestad, su siudat natal.

Na Aruba tabatin tres lugá kaminda mi tata tabata kita su sombré ora e pasa, esta:

Dilanti di misa, dilanti di santana i dilanti di estatua di su yu, Boy!